



Datë: 12.06.2025
Numër Protokolli: 4240/2025

A.nr.850/2025

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Malsore Gashi Bajraktari, kryetare, Ardita Haxhnikaj Demi dhe Eshref Shabani, anëtarë, me Avdyl Bekteshi, në cilësinë e procesmbajtësit, në procedurës sipas ankesës me numër A.nr.850/2025, të datës, 07.05.2025, të parashtruar nga ankuesi S.R, kundër Shërbimit korrektues të Kosovës, në çështjen juridike *“kërkese nga marrëdhënia e punës”*, duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.2 dhe 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datën 12.06.2025, mori këtë:

V E N D I M

I. Detyrohet Drejtori i Qendrës së Paraburgimit në Pejë, që brenda afatit prej pesëmbëdhjetë (15) ditësh nga dita e pranimit të këtij vendimi të shqyrtoj kërkesën e datës 17.01.2025 të parashtruar nga ankuesi S.R, dhe të nxjerr akt administrativ në pajtueshmëri me dispozitat ligjore në fuqi.

II. Obligohet Drejtori i Përgjithshëm i Shërbimit Korrektues të Kosovës, që të kujdeset për zbatimin e këtij vendimi si në pikën I.

III. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarjes së veprimeve në pajtim me këtë vendim.

A r s y e t i m

Ankuesi S.R(*tutje referuar vetëm ankuesi*), më datë 02.05.2025 përmes postes ka parashtruar ankesë për Këshillin e Pavarur Mbikëqyrës për Shërbimin Civil të Kosovës, ndërsa është pranuar më datë 07.05.2025 dhe është regjistruar nën shenjën A.nr.850/2025, kundër heshtjes së Drejtorit të Qendrës së Paraburgimit në Pejë, lidhur me kërkesat apo ankesat e tij përmes E-mailit, gjegjësisht atë të datës 20.08.2024, 25.10.2024 dhe 17.01.2025.

Këshilli i Pavarur Mbikëqyrës për Shërbimin Civil i Kosovës, bazuar në dispozitat e Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregullores Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datë 26.05.2025 ka kërkuar përgjigje në ankesën e ankuesit nga Shërbimi Korrektues të Kosovës, ndërsa ky i fundit më datë 29.05.2025, ka përcjell përgjigje në ankesë.

Kolegji për Shqyrtimin dhe Vendosjen e Ankesave, për shqyrtimin e kësaj lënde ka administruar këto prova: Ankesën me numër protokolli 3059/2025 të datës 07.05.2025, e parashtruar nga ankuesi në Këshillin e Pavarur Mbikëqyrës të Shërbimit Civil të Kosovës; Emailin e datës 20.08.2024, 25.10.2024 dhe 17.01.2025 të ankuesit për I.F; Kërkesën për përgjigje në ankesë e datës 26.05.2025; Përgjigjen në ankesë e datës 29.05.2025; Kontratës punë për kohë të pacaktuar e datës 30.06.2018; Përshkrimin e detyrave të punës për pozitë Zyrtar Korrektues.

Kolegji i Këshillit pas shqyrtimit dhe analizimit të shkresave të lëndës të parashtruara nga palët në procedurë, ka gjetur se rasti i ankuesit, duhet të kthehet në detyrim për vendosje, **sepse:**

Nga administrimi i provave të lëndës, Kolegji i Këshillit, ka gjetur se ankuesi sipas Kontratës së Punës për kohë të pacaktuar të datës 30.06.2018, mban pozitën e punës *Zyrtar Korrektues*, në Qendren e Paraburgimit në Pejë, në kuadër të Shërbimit Korrektues të Kosovës.

Tutje nga shkresat e lëndës, ankuesi fillimisht ankues më datë 20.08.2024 i është drejtuar me email Drejtorit të Qendrës së Paraburgimit në Pejë lidhur me incidentin në këtë qendër më datë 13.05.2024, ndërsa më datë 30.10.2024 prapë i është drejtuar me kërkesë Drejtorit të Qendrës së Paraburgimit në Pejë lidhur me raportin për lëndim në punës duke kërkuar përgjigje, kurse më datë 30.10.2024 ankuesi ka pranuar një email nga Drejtori i Qendrës së Paraburgimit në Pejë i cili thekson se jeni njoftuar zyrtarisht lidhur me raportin dhe të njëjtin e keni nënshkruar. Po ashtu ankuesi më datë 17.01.2025 serish i është drejtuar përmes emailit Drejtorit të Qendrës së Paraburgimit në Pejë, se lidhur me sulmin nga i burgosuri ku si pasojë më është thyer dora duke kërkuar që të merr një përgjigje meritore.

Kolegji i Këshillit, ndërlidhur me rregullat e veprimeve procedurale të një organi publik, ju referua dispozitave të Ligjit Nr.05/L-031 për Procedurën e Përgjithshme Administrative (*tutje referuar: LPPA*), përkatësisht nenit 10 paragrafi 2 ku përcaktohet se: *2. Organi publik zhvillon procedurën administrative sa me të shpejtë dhe me sa më pak shpenzime, për të dhe për palën, duke mos cenuar çfarë është e nevojshme për një rezultat të ligjshëm e të përshtatshëm të procedurës administrative*, nenit 98 paragrafi 1 dhe 2 ku përcaktohet se: *1. Procedura administrative nisur sipas kërkesës, do të përfundojë sa më shpejt që të jetë e mundur, por jo më vonë se sa afati i përcaktuar me ligj të veçantë për atë lloj procedure. 2. Në rast se ligji i veçantë nuk ka paraparë një afat, siç është paraparë në paragrafin 1 të këtij neni, afati i përgjithshëm i zbatueshëm për përfundimin e procedurës administrative është dyzetepesë (45) ditë nga fillimi i saj*, si dhe nenit 97 paragrafi 1 të këtij ligji, ku përcaktohet se: *1. Një procedurë administrative e nisur sipas kërkesës, përfundon me njoftimin e një akti administrativ apo lidhjen e një kontrate administrative*, dhe si rrjedhojë në kuptim të këtyre dispozitave ligjore si dhe bazuar në shqyrtimin e provave materiale të çështjes, Kolegji i Këshillit konstatoi se organi përkatës i punësimit, në rrethanat e rastit konkret, nuk ka vepruar në pajtueshmëri me dispozitatat përkatëse ligjore, në raport me kërkesën përmes emailit të datës 17.01.2025 të parashtruar nga ankuesi, ngase sipas bazës ligjore si me sipër, vullneti i organit publik në realizimin e autoritetit publik formësohet në procedurë administrative dhe manifestohet në formën e njërit prej veprimeve administrative, siç janë: akti administrativ; kontrata administrative apo akti real, dhe se në vlerësimin e Kolegjit, organi përkatës i punësimit, në kuadër të autorizimeve të përcaktuara me legjislacionin në fuqi, është dashur që të shqyrtoj kërkesën e ankuesve të datës 08.10.2024 dhe të nxjerrë akt administrativ në kuptim të vendosjes dhe të njoftoj palën për aktin e tillë, brenda një afati prej 45 ditësh sikurse përcaktohet me nenin 98 paragrafi 2 apo brenda afatit të vazhduar sipas nenit 99 paragrafi 1 të LPPA-së.

Rrjedhimisht, në vlerësimin e Kolegjit të Këshillit, heshtja dhe mos përgjigja e organit të administratës në raport me kërkesën e datës 17.01.2025, të parashtruar nga ankuesi, cenonjë të drejtat

e ankuesit në kuptimin e të drejtave procedurale dhe për rrjedhojë edhe vendosjen në mënyrë meritore, ngase, ashtu sikurse është thënë në arsyetim të këtij vendimi, në kërkesën e parashtruar të organi i punësimit, ankuesi pretendon në realizimin e disa të drejtave të cilat mendon se janë duke ju mohuar, apo janë duke ju shkelur.

Kështu që thënë si më sipër e duke u bazuar në nenin 18 paragrafin 1 nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi të aprovoj si të bazuar ankesën e ankuesit vetëm në kuptim të shkeljeve procedurale, duke detyruar Drejtorin e Qendrës Korrektuese në Pejë, që të shqyrtoj kërkesën e datës 17.01.2025, të parashtruar nga ankuesi, në pajtim me dispozitat ligjore në fuqi me qëllim që i njëjti të nxjerr akt administrativ lidhur me kërkesën e shqyrtuar.

Andaj, pas analizimit dhe vlerësimit të të gjitha shkresave të lëndës dhe duke u bazuar në nenin 18 paragrafi 1 nën paragrafi 1.2 dhe 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi si në dispozitiv të këtij vendimi.

Vendimi hyn në fuqi në ditën e nënshkrimit nga Kryetarja e Kolegjit.

Këshillë juridike: *Kundër vendimit të Këshillit, pala e pakënaqur e mund të iniciojë konflikt administrativ në Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk ndalon ekzekutimin e këtij vendimi.*

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.850/2025

Avdyl BEKTESHI

Procesmbajtës

Malsore Gashi BAJRAKTARI

Kryetare e Kolegjit

Vendimi i dërgohet:

- Ankuesit S.R;
- Organit të punësimit: Drejtorit të Përgjithshëm; Drejtorit të Qendrës së Paraburgimit në Pejë dhe Udhëheqësit të Njesisë së Burimeve Njerëzore të Agjencisë Pyjor të Kosovës; dhe
- Arkivit të KPMSHCK-së.